

清

史

稿

清史稿

列傳

藩部六

杜爾伯特

舊土爾扈特

新土爾扈

和碩特

杜爾伯特部游牧金山之東烏蘭固木地東薩拉陀羅海納林蘇穆河接唐努烏梁海南哈喇諾爾齊爾噶岡山接科布多牧場及明阿特西索果克河接阿爾泰烏梁海北阿斯哈圖河接烏里雅蘇台卡倫本額魯特結羅斯種與內扎薩克之隸科爾沁右翼一旗同名異族厄魯特舊設四衛拉特杜爾伯特其一也輝特隸之後並稱衛拉特詳青海厄魯特部傳準噶爾台吉噶爾丹虐諸昆弟子姓兄子策妄阿喇布坦棄之徒博囉塔拉杜爾伯特諸台吉從往分牧額爾齊斯迄準噶爾族亂杜爾伯特內附設扎薩克十有四附屬特扎薩克二統稱賽因濟雅哈圖杜爾伯特部杜爾伯特祖曰博羅納哈勒與準噶爾祖額斯墨特達爾漢諾顏爲昆弟博羅納哈勒子額什格泰什三傳至達賴泰什子七

長敏珠裔不著次垂因次陀音其裔皆隸察哈爾次鄂木布岱青和碩齊爲扎薩克汗車凌親王車凌烏巴什貝勒剛多爾濟三旗祖次衮布次達延泰什次塔爾珣泰什其裔隸各扎薩克達賴泰什弟曰保伊爾登子四長鄂爾羅斯爲扎薩克台吉恭錫拉達什敦多克二旗祖次巴特瑪多爾濟爲扎薩克貝勒色布騰貝子班珠爾輔國公剛巴圖蒙克台吉額布根五旗祖次額璘沁巴圖爾爲扎薩克貝子根敦瑪什巴圖台吉巴爾三旗祖次伯布什爲扎薩克郡王車凌蒙克一旗祖和碩特台吉鄂齊爾圖爲衛拉特首汗綽羅斯諸台吉隸之順治十四年杜爾伯特台吉陀音遣使哈什哈等自鄂齊爾圖所以貢馬至十五年鄂木布岱青和碩齊子伊斯扎布復遣使額爾克貢馬康熙十四年台吉額勒敦噶木布從齊爾圖使入貢自稱爲阿勒達爾泰什族阿勒達爾泰什者垂因子也時蓋爲所部長十六年噶爾丹戕鄂齊爾圖遣使告自稱博碩克圖汗因脅諸衛拉特奉己令諭給諸貢使符驗不從詭稱杜爾伯特及和碩特土爾扈特雖隸準噶爾以牧地遠不及給二十四年定四衛拉特貢例噶爾丹使入

關額二百人餘市張口及歸化城其綽羅斯自貢之噶爾瑪岱青和碩齊杜爾伯特台吉阿勒達爾泰什及和碩特土爾扈特長如之三十二年台吉巴拜來歸巴拜者陀音子也噶爾丹以附牧強取其戚屬巴拜索之不獲畏弗敢爭嗣從噶爾丹侵略爾喀至烏蘭布通欲棄之降爲伊拉古克三呼圖克圖所陰阻至是偕從子齊克宗至上以其習邊外不便駐內地詔隸喀喇沁牧三十六年台吉車凌復來歸車凌爲阿勒達爾泰什係其父烏爾袞從噶爾丹侵略爾喀爲大軍所敗攜屬三百餘竄圖拉河境上聞之諭遣護軍統領瑪喇曰爾等馳赴圖拉遣人問故伊等或欲內附懼爲喀爾喀阻或力不能至而在彼可收之至如欲往阿勒台則聽之既不內附又不前往則當相機行事瑪喇至偵不獲縱噶爾丹再侵略爾喀烏爾袞復從至和扎輝特台吉根敦陳斬之車凌從噶爾丹竄牧巴顏烏蘭根敦以告詔使諭車凌降不至噶爾丹尋敗遁車凌將乞降我師不知而擊之乃逸其屬綽克圖巴圖爾宰桑莽奈哈什哈都喇圖巴圖爾班丹哈什哈宰桑扎爾瑚齊什賁達爾漢宰桑蘇穆齊扎爾瑚齊阿哈雅扎

爾瑚齊畢哩克扎爾瑚齊等率衆百餘內附時巴拜屬從至詔置張家口外巴拜遣宰桑博克請賜所屬遣官察給之巴拜尋來朝請效力禁廷諭曰爾先衆來降朕自有加恩之處其仍率所屬駐喀沁牧車凌敗知噶爾丹不足恃遣使奏杜爾伯特部自始貢中國至阿勒達爾泰什往來朝請已五世前蒙恩遣巴扎爾傳諭臣屬功格額爾克今臣歸誠許恩待臣遵旨降反爲將軍所繫臣復懼逃逃乞賜恩綸諭曰車凌來歸時我綠營蒙古兵不知而擊之今復遣使奏請理藩院其檄令速降朕將優恤之會遣使招噶爾丹詔以其使從至則車凌他徙其使齎檄往諭車凌遣功格額爾克奉表降自詣大將軍費揚古所告曰烏蘭布通戰後臣父烏爾袞降志誠不獲達臣前爲大軍擊心甚懼率殘卒十餘奔達瑪爾遇噶爾丹偕赴薩克薩克圖固哩克未浹旬棄之走額克阿喇勒臣知噶爾丹罪與彼伍徒就死聞上撫卮魯特降人咸得所集臣屬二百五十餘戶內徙道踰汗阿林翁吉閱四月始至乞以此情代奏費揚古馳疏聞留其孥屬於張家口外遣車凌覲行營詔授散秩大臣巴拜如之明年詔以巴拜

車凌屬謀察哈爾正白旗編佐領二車凌屬六品官班丹畢哩克及壯丁百餘以功格額爾克爲驍騎校領之巴拜屬五品官戴和碩齊納木喀琳沁額爾德尼達木巴六品官達爾扎巴圖蒙克色稜泰墨爾根伊什德克及壯丁百餘以達木巴領之後巴拜卒無嗣車凌卒子策旺達爾濟嗣五十四年詔招降台吉丹津於阿勒台丹津者鄂木布岱吉和碩齊孫也與車凌爲昆弟游牧阿勒台戶千餘和托輝特台吉博貝請赴阿勒台招丹津降抗卽以兵取之諭車凌遣使齋書從比至丹津徙策旺阿喇布坦牧五十九年靖逆將軍富寧安擒台吉垂木伯爾於伊勒布爾和碩蓋是時策旺阿喇布坦假兵力據四衛拉特令諸台吉環牧烏嚕木齊額爾齊斯爲負隅計我大兵因屯巴里坤阿勒台兩路遏之偵準噶爾襲唐古特詔大軍往討罪復以兵分擊準噶爾境垂木伯爾者丹津族台吉也率屬駐烏嚕木齊設哨伊勒布爾和碩阿克塔斯路富寧安以兵至阿克塔斯設哨賊遁尾至伊勒布爾和碩擊之擒垂木伯爾歸烏嚕木齊衆聞之咸竄乾隆十八年冬台吉三車凌來歸三車凌者曰車凌曰車凌烏巴什

曰車凌蒙克統稱杜爾伯特台吉巴約特其屬部也杜爾伯特以車凌爲長車凌烏巴什次之巴約特以車凌蒙克爲長聚族額爾齊斯準噶爾台吉舊有策凌敦多布二大策凌敦多卜善謀小策凌敦多卜以勇聞策妄阿喇布坦及子噶勒丹策凌倚任之大策凌敦多卜孫達瓦齊襲殺噶勒丹策凌嗣而自立小策凌敦多卜孫訥默庫濟爾噶勒與構兵各令杜爾伯特族助車凌等欲拒之不敵欲事之莫知所從集族言曰依準噶爾非計也不如歸天朝爲永聚計有喀爾喀卒額璘沁達什者爲準噶爾所掠聞其謀脫歸以告詔定邊左副將軍喀爾喀親王成衮扎布俟車凌等至察其誠可納之旣而三車凌棄額爾齊斯牧山準噶爾東烏蘭嶺烏英齊而行越旬有九日至博東齊遣使巴顏克什克都圖爾噶等馳赴巴顏珠爾克以降故告而留其衆於額克阿喇勒以待成衮扎布遣守汛者視慮詐檄喀爾喀兵備之以聞諭曰車凌等降非叵測也達瓦齊與訥默庫濟爾噶勒構兵車凌等助之勝負難預定幸而從者勝卒爲人役不若歸降之爲得計也旣遣使以情告若仍令處汛外恐遣兵至或有失可卽

徙入內汛暫給牧畜徐議安置事宜先以車凌車凌烏巴什及從至者酌遣數人令其瞻仰朕躬朕自優加恩賚遣侍郎玉保齋賞物往諭甫就道上念所部習邊外以未出痘者生身若卽令至內地雖傷一僕從不忍詔俟明歲受朝塞外勿遽來京師負矜恤意負而三車凌懼準噶爾兵襲請急徙入汛且獻馬爲贊成貸扎布納之令暫駐烏里雅蘇臺達瓦齊遣宰桑桑禰木特以兵襲不及乃逸玉保至三車凌忭迎十里外宣諭之說奏噶勒丹策凌時思內附以衆志未變且法賤故不獲問今避亂歸思覲天顏蒙恩軫念避痘令緩入覲期請先以宰桑等朝京師車凌使曰和通巴顏克什克車凌烏巴什使曰哈錫塔車凌蒙克使曰巴圖明年正月使至詔與朝正諸藩臣宴上以所部間道至駝馬疲甚且乏畜產不忍遽遠徙詔視推河扎克拜達里克庫爾奇勒可耕地置之殺種取諸歸化城復賜車凌車凌烏巴什羊各五千車凌蒙克羊三千贖之尋定牧扎克拜達里克車凌烏巴什屬巴啓齊倫等叛逸喀爾喀卒盜車凌屬伊爾都齊馬索不給且射殺之詔喀爾喀扎薩克以鄂爾坤防秋兵百視牧復檄諸

扎薩克鄰汛者戈叛賊務獲後巴啓等就擒論罪夏四月曰內扎薩克及喀爾喀成設正副蒙長董理牧務今新降台吉車凌等攜至戶口悉編旗分佐領其設正副盟長如內扎薩克及喀爾喀例賜養因濟雅哈圖盟名五月駕幸熱河駐蹕避暑山莊三車凌率諸台吉至賜宴萬樹園命觀火戲諭曰杜爾伯特台吉等皆準噶爾渠酋向慕仁化率萬餘衆傾心來歸宜數渥澤錫予封爵以示懷柔至意其各鈐所屬令安分謀業勿負朕恩時所部設扎薩克十有三自三車凌外曰色布騰曰蒙克特穆爾曰根敦曰班珠爾曰剛巴圖蒙克曰禡什巴圖曰達什敦多克曰恭錫喇曰巴爾封親郡王貝勒貝子公一等台吉有差後蒙克特穆爾以從車凌蒙克子巴朗叛逃別授其弟額布根爲扎薩克餘仍爵詳列傳秋七月將軍策楞從徙三車凌牧於歸化城青東山時議備兵征達瓦齊諭曰巴朗等甫叛竄若徙之將滋新降欺懼且非辦理準噶爾本意其令安處舊牧勿他徙三車凌之至也告族台吉訥默庫留準噶爾戶千餘剛多爾濟額爾德尼巴圖博羅特如之將乘間內徙至是果借輝特台吉阿睦爾撒納和

額特台吉班珠爾至詔賜牧畜置塔楚鄰三車凌牧十月駕由盛京旋駐蹕避暑山莊訥默庫等入覲復賜宴錫之爵曰訥默庫封郡王曰剛多爾濟曰巴圖博羅特封貝勒曰布圖克森曰額爾德尼曰羅壘雲端封貝子曰布顏特古斯曰蒙克博羅特封輔國公曰烏巴什曰伯勒克封一等台吉凡設扎薩克十詔編旗分佐領如三車凌例分左右翼設正副盟長各一訥默庫者車凌烏巴什兄子剛多爾濟布圖克森額爾德尼羅壘雲端烏巴什伯勒克皆車凌烏巴什曾祖察袋裔布顏特古斯巴圖博羅特蒙克博羅特亦噉族也後訥默庫晉親王子喇嘛扎卜授貝勒以叛除爵布圖克森羅壘雲端烏巴什皆無嗣停襲伯勒克卒子多第巴襲多第巴卒子尼爾瓦齊襲尼爾瓦齊卒無嗣以多第巴弟布顏德勒格爾襲布顏德勒格爾卒無嗣停襲布顏特古斯卒子舍稜襲以叛除爵剛多爾濟無嗣以從子達瓦不勒襲額爾德尼卒無嗣停襲巴圖博羅特蒙克博羅特皆以叛除爵故自剛多爾濟外皆不立傳二十年烏梁海降臣察達克招服包沁察獲杜爾伯特屬戶獻詔給所部等從大軍征達瓦齊三車凌

既入覲歸詔選兵二千以車凌領其一隸北路車凌蒙克色布騰從之以車凌
烏巴什領其一隸西路各授參贊大臣訥默庫等繼至請從軍詔隸西路以車
凌烏巴什訥默庫皆幼不更事詔調車凌蒙克赴西路軍從車凌烏巴什訥默
庫等行而是時阿睦爾撒納爲北路副將軍訥默庫其妻弟也固請隸北路軍
允之以故偕三車凌至者隸西路副將軍薩拉勒隊偕訥默庫至者隸北路副
將軍阿睦爾撒納隊賜車凌整裝銀二千車凌烏巴什訥默庫各減十分之二
給從軍者羊及餼有差復詔欲車凌及車凌蒙克遣宰桑以善耕卒百赴額爾
齊斯蓋杜爾伯特衆兼耕牧業視喀爾喀專以牧爲產者異將遣綠旗及喀爾
喀兵屯耕額爾齊斯以所部識水泉道且善耕命簡卒往導俟大功成遣牧衆
歸額爾齊斯會北路軍奏至以訥默庫參贊列名詔西路軍奏如之列三車凌
及色布騰名次參贊大臣鄂容安後復諭定北將軍班第伊犁定遣車凌車
凌烏巴什等率新降諸台吉入覲初議征達瓦齊上以衛拉特諸台吉後先附
凡數萬衆錯處內牧非得地衆建之不可詔俟準噶爾定將復設四衛拉特以

車凌爲杜爾伯特汗別以班珠爾爲和碩特汗以阿睦爾撒納爲輝特汗以噶爾丹策凌子姓爲綽羅斯汗車凌等赴軍時輒聞命大兵抵伊犁達瓦齊就擒班第以車凌烏巴什訥默庫及新降之綽羅斯台吉噶勒藏多爾濟和碩特台吉沙克都爾曼濟輝特台吉巴雅爾等列入覲初班駕幸木蘭車凌等至召覲行轅慰諭之旋避暑山莊御淡泊敬誠殿受朝詔以車凌爲杜爾伯特汗諸扎薩克隸之札薩克而下設管旗章京副管旗章京參領佐領驍騎校等職時阿睦爾撒納覲轅四衛拉特知不可得叛竄班珠爾以附逆械至噶勒藏多爾濟沙克都爾曼濟巴雅爾仍各賜汗爵統所部衆諭曰準噶爾互相殘殺羣遭塗炭不獲安生朕統一寰區不忍坐視特發兩路大兵進討諸台吉宰桑等畏威懷德率屬來歸從軍自效今已平定伊犁擒獲達瓦齊是用廣沛仁恩庸效績準噶爾舊有四衛拉特汗令卽仍其部落樹之君長其各董率所屬務勤蕃教共圖生聚受朕無疆之福其後綽羅斯汗噶勒藏多爾濟叛從子扎納噶爾布戮之所部就滅輝特汗巴雅爾以叛爲大軍所擒誅和碩特汗沙克都爾

曼濟懷貳志副都統雅爾哈善殲其衆於巴里坤惟杜爾伯特部恪守臣節世受封爵罔替是年十二月車凌等以乏牧產請徙額克阿喇勒諭曰前議平定伊犁後遣歸舊牧額爾齊斯若額克阿喇勒距額爾齊斯較扎克拜達里克路更邇且附內汛外調所部兵亦易俟擒獲阿逆後仍當遣歸舊牧所部生計既艱其給籽種六百石務令及時耕種毋誤農期至從軍所給駝馬自應交納但念往返道遠牲畜不無疲瘁可姑緩期二載訥默庫之將從征達瓦齊也請徙牧拜達里克北扎布堪河源博囉喀博齊爾至鄂爾海喀喇烏蘇界允之諭努力成功勿念游牧衆至是以車凌等將徙牧詔往會而訥庫默隱有叛志謀竄就阿睦爾撒納剛多爾濟巴圖博羅特布顏特古斯等阻之卒不戢率衆復乘間切驛騎戕守汛弁奪運糧商民駝物及貲二十一年春駐防烏里雅蘇臺辦事大臣阿蘭泰偕車凌車凌烏巴什等以兵擒訥默庫及其孥械至諭如律詔不墜逆諸扎薩克各安游牧勿疑懼復諭曰剛多爾濟等屬妄行劫掠應交部議扎薩克罪但念伊等新降未諳內地禁例姑從寬免夏以所部鄰扎哈沁盜

不戢諭曰伊等生計全賴牧畜若復盜竊相仍不獲蕃孳生計焉能充裕其各
鎔東部衆務期守分安生副朕休養羣生至意有伯什阿噶什者伊什扎布之
曾孫也祖扎勒父車凌多爾濟伯什阿噶什兄曰布達扎卜曰達瓦克什克弟
曰達瓦濟特曰格咱巴克聚牧伊犁河西沙拉伯勒境鄰哈薩克牧達瓦齊虐
其衆伯什阿噶什將棄之懼襲而寢大軍征達瓦齊抵伊犁班第遣使招因獻
籍三千餘戶降將遣從車凌等入覲告哈薩克數掠所部請歸視比抵牧偵哈
薩克集兵遣告且請大軍援諭嘉其恭順會阿睦爾撒納叛逆黨擾伊犁遣和
碩特輔國公納噶察齋敕往諭曰準噶爾內亂類仍各部人衆咸失生業朕爲
一統天下之君懷保羣生無分中外特發大軍往定伊犁方欲施恩立制永安
反側乃逆賊潛懷叛志妄思并吞諸部肆其荼虐罪狀已著畏誅潛遁朕已命
將窮迫務期弋獲逆賊一日不獲諸部一日不安爾台吉輸誠歸命果能仰體
朕旨去逆效順或以兵協勦阿逆或俟至爾牧擒獻之朕必大沛殊恩爾其奮
勉自效達瓦齊復奏伯什阿噶什及庫木諾顏台吉諾爾布必無異志命遣之

書未達而伯什阿噶什徙牧初傳借諾爾布內附久之不至或以居博囉塔拉告詔將軍策楞等偵之無其蹤時阿睦爾撒納敗竄諭參贊大臣侍郎玉保等偵阿逆赴伯什阿噶什牧卽諭擒獻或故縱以兵勦之伯什阿噶什養子博東齊尋借宰桑諾斯海聚衆至以哈薩克侵牧告宰桑賽音伯勒克得木齊恩克濟爾哈爾等踵至告哈薩克追掠聞走乃免詔博東齊以兵迎其父暫置從衆於額爾齊斯諾斯海護視之賽音伯勒克或從博東齊往或留牧額爾齊斯惟其便博東齊將行伯什阿噶什攜戶八百餘抵額爾齊斯請內附烏巴什其族台吉也從至詔封伯什阿噶什爲扎薩克和碩親王烏巴什爲扎薩克固山貝子賜諭曰爾誠心感戴率衆投誠前大軍抵伊犁卽謁將軍大臣甫欲加恩封賞旋遇阿逆背叛未獲舉行爾爲哈薩克所掠輾轉遷徙始克內附爾衆甫至不必簡兵往從大軍亦無須徙內地卽游牧額爾齊斯所爾族台吉車凌等將歸舊牧爾等衆族而處實爲允協不必遠離故土徒勞往返也命甫下伯什阿噶什等攜衆抵哈達青吉勒詔暫留俟明歲歸額爾齊斯牧七月車凌車凌烏

巴什剛多爾濟等以徙牧額爾齊斯請定入覲年班諭嘉其誠摯詔自來年始定三班前給從軍駝馬姑緩期納示恤九月伯什阿噶什來朝弟達瓦濟特及兒子丹巴都噶爾布魯特扣肯以視牧故各遣宰桑代至賜宴資馬七百牛百五十羊三千詔編旗分佐領如三車凌及剛多爾濟等來歸例別爲一盟以伯什阿噶什爲盟長烏巴什副之丹巴都噶爾授協理台吉伯什阿噶什甫歸牧其妻卒遣侍衛佛保往醮伯什阿噶什尋卒無子詔副都統唐喀祿賻祭宣諭以丹巴都噶爾爲扎薩克固山貝子以達瓦濟特爲扎薩克公轄伯什阿噶什衆聽歸車凌牧及內徙而丹巴都噶爾與佐領色布騰互攘畜產佛保將至牧駝馬爲所掠詔徹恩命還復諭烏巴什勿驚懼俟事定歸車凌牧後烏巴什卒停斃二十二年車凌以哈薩克不擒獻阿逆諸厄魯特叛擾邊請山額爾齊斯徙牧烏蘭固木避之時喀爾喀貝子車布登扎布遵旨遣兵勦掠佛保賊牧伯什阿噶什風戶給喀爾喀將遣博東齊歸車凌牧族台吉布圖庫班珠爾布林等挈屬至稱與車凌等析處久請異牧允之布圖庫等抵汛聞佛保自哈達吉

吉勒歸和碩特台吉桑濟復掠諸道遣從卒馳馬迎上聞之諭曰車凌等自歸誠以來感激朕恩約束屬衆甚爲宥諡嗣因叛賊紛起亟請內徙游牧其歸附之心益堅可允所請并給穀種令爲謀生資博東齊雖與杜爾伯特同族若往歸之反仰賴車凌等養贖著遣往烏里雅蘇臺交車布登扎布酌徙呼倫貝爾通肯呼裕爾等處布圖庫班珠爾等迎接侍衛佛保俟至烏里雅蘇臺軍所各給幣賞之後博東齊及布圖庫等咸置呼倫貝爾布圖庫班珠爾以內附誠各授二等台吉而貝勒巴圖博羅特輔國公舍稜不從車凌等徙牧叛應阿睦爾撒納副都統瑚爾起以兵擒諸輝巴朗山婁罕悉論誅先是杜爾伯特及烏梁海未內屬錯牧額爾齊斯後杜爾伯特諸台吉至游牧扎克拜達里初徙牧額克阿喇勒再徙額爾齊斯烏梁海就撫以烏蘭固木地給之車凌等復請由額爾齊斯往徙遣都統納穆扎爾勒杜爾伯特及烏梁海牧界車凌復請以烏蘭固木爲屯耕地而游牧於科布多額克阿喇勒允之詔嚴禁所屬勿攬竊並以錯牧不便定烏蘭固木爲杜爾伯特牧別以科布多爲烏梁海二牧十四年烏

梁海以科布多產貂不給捕請徙就阿勒台陽額爾齊斯諭車凌烏巴什等曰
額爾齊斯爲爾舊牧今爾移處烏蘭固木烏梁海察達克請游牧額爾齊斯地
向曾降旨爾等若願歸舊牧聽爾便今哈薩克已全部內附伊犁厄魯特賊衆
復殲無子遺若爾果願歸舊牧可卽徙往額爾齊斯所遺烏蘭固木自可給烏
梁海處之但哈薩克新附非爾等久爲內屬者比務宜嚴飭所屬安靜無事若
爾部衆既遵鈴束而哈薩克反來肆擾可卽擒誅之爾等或安土重遷則額爾
齊斯地與其爲哈薩克俄羅斯所竊據不若令烏梁海往徙之也車凌烏巴什
等奏察達克所請地係烏梁海舊牧距臣等牧遠且烏蘭固木地肥不饒臣等
游牧久請勿徙以額爾齊斯地給烏梁海詔如所請是年十月以大軍定回部
歲功諭車凌烏巴什等知之十二月偵哈薩克襲烏梁海以兵三百餘擊走得
旨獎賚二十五年四月以所部有溫圖呼爾者貧不給聞其弟居察哈爾牧告
諸扎薩克往就之諭曰杜爾伯特自歸誠以來編設旗分佐領原欲伊等各安
生業若不善恤之漸至析處殊爲可憫其各加意撫綏令守分謀生勿至流離

失所副朕痼瘵一體之懷七月車凌烏巴什等寇蹕行圍奏所部蒙恩安置牧
產漸饒嗣請自備駝上嘉其誠惻不忍驟勞之詔仍官給駝馬二十七年詔左
右翼各設副將軍一右翼用正黃旗蘇左翼用正白旗蘇以敕印軍符給之所
部旗十有六爵如之扎薩克特古斯庫魯克達賴汗一扎薩克和碩親王一扎
薩克多羅郡王一扎薩克多羅貝勒二扎薩克固山貝子二扎薩克鎮國公一
由貝子降襲扎薩克輔國公二扎薩克一等台吉四輝特扎薩克一等台吉
二乾隆四十五年命烏里雅蘇台將軍巴圖查辦喀爾喀侵佔杜爾伯特扎哈
沁等部界址道光二年修科布多衆安廟三月科布多參贊大臣那彥寶奏定
蒙民商民貿易章程杜爾伯特扎哈沁明阿特額魯特均准給票與商民貿易
六年回疆軍興杜爾伯特汗王公扎薩克等獻駝馬助軍十二月以杜爾伯特
汗齊旺巴勒楚克等復輸駝助軍上嘉賚之九年杜爾伯特貝子奇默特多爾
濟呈控科布多參贊大臣額勒錦需索馬匹擾累各部鞫實罷之十八年是部
以兵從烏里雅蘇台參贊大臣車林多爾濟驅逐闌入烏梁海之哈薩克十八

年十二月以烏里雅蘇台參贊大臣車林多爾濟奏科布多參贊大臣管理烏梁海八部落地地方遼闊多興訟端允增置幫辦大臣十九年給是部官兵俸賞行裝銀咸豐三年二月是部汗王公等捐助軍需溫旨卻之同治三年烏魯木齊等城回匪滋事調是部兵援之尋以不得力徹歸八年以杜爾伯特汗嗣絕將軍麟興等奏左翼汗旗下舊管十佐領戶一千五百有奇右翼親王旗下舊管十一佐領戶一千二百上下右翼貝勒旗下舊管二佐領僅一百六十餘戶以爵而論貝勒較輕以戶口而論不過抵汗三十分之一擬親王棍布扎布令折回承襲汗爵以貝勒巴雅爾扎那承襲親王貝勒一缺如無可承襲之人俟汗王襲爵定後即將貝勒暫行停襲下所司九年命以故汗密什多爾濟族弟噶章那木濟勒襲汗棍布扎布等襲親王貝勒如故回匪東竄陷烏里雅蘇台十一月科布多參贊大臣奎昌等奏匪撲烏里雅蘇台地方各台潰散科城街市商民惶惑調附近之杜爾伯特扎哈沁明阿特額魯特盟長總管等卽發兵來城聽候調遣尋奏杜爾伯特左翼兵四百名右翼及明阿特額魯特兵各二

百名扎哈沁公兵及總管兵各五十名均到科城收伍命撥科布多餉銀十萬兩十一年十一月予辦差無誤之杜爾伯特右翼盟長棍布扎布等獎是月科布多參贊大臣長順等奏十月十七十八等日匪徑撲本城參將英華督弁兵登壁迎擊匪始敗退守備賀遐齡等陣亡十九匪復攻撲南關不得逞於二十日由東南山路仍向扎哈沁部落奔竄自後回匪出沒於扎哈沁土爾扈特諸部之地是部警備益嚴至西路肅清始息警徹戌光緒七年以改議俄約增城科布多之戍事定徹之光緒二十六年拳匪事起北路戒嚴科布多參贊大臣瑞洵議舉辦蒙古團練令杜爾伯特每旗挑選兵丁二百名一半馬隊一半步隊駐防本旗十月事定裁撤二十八年四月瑞洵以杜爾伯特正副盟長等保全俄商遺棄貨物毫無損失請准獎叙允之七月賑杜爾伯特右翼公多諾魯布旗災並給籽種大小麥一百石引渠澆舊墾地什圖那米拉察罕哈克三處之地二十九年閏五月予杜爾伯特左翼正盟長副將軍特固斯庫魯克達賚汗噶勒章那木濟勒策琳副盟長貝勒納遜布布彥左翼扎薩克郡王圖柯莫

勒右翼正盟副將軍扎薩克親王索特納木扎木柴三眼花翎左翼扎薩克貝勒納遜布彥等雙眼花翎餘給獎有差是年辦布倫托海屯田渠工以杜爾伯特左右翼助借駝隻均給劑價銀其後參贊大臣連魁等議開烏蘭固木等屯田宣統二年四月索特納木納不柴爲資政院欽選議員三年庫倫獨立喀爾喀四部無梗抗者是部汗噶勒章那木濟勒獨不增聽參贊大臣溥鐸節制如故其地雜耕牧有鹽有鹽共有佐領三十五杜爾伯特附近之部同隸科布多參贊大臣者曰扎哈沁東扎薩克圖汗部南新疆鎮西四阿爾泰烏梁海北科布多屯田官廠初禱木特額魯特人號庫克辛爲準噶爾之扎薩哈沁宰桑扎哈沁譯言汎卒以宰桑領之禱木特守阿爾泰汎游牧布拉罕察罕扎輝其東爲喀爾喀有烏梁海界之其西爲準噶爾有包沁爾雜準及噶雜特塔本集賽界之包沁爲回族準噶爾呼駿曰包以回人司駿故名噶拉雜特塔本集賽皆準噶爾鄂拓克鄂拓克如各旗佐領乾隆十一年準噶爾台吉策妄多爾濟遣禱木特請赴藏熬茶十八年杜爾伯特台吉車凌乘準噶爾來降台吉達瓦

遣禱木特退之由博爾濟河入喀爾喀汛復逸出諭責駐防烏里雅蘇台達青阿罪明年春達青阿誘擒之詔宥罪遣歸有準噶爾宰桑別號通禱木特游牧誥海克卜特爾近索勒畢嶺爲布拉軍罕察輝托罕下游禱木特將掠通禱木特爲請降計通禱木特覺誘執之內大臣薩拉喇勒特得狀由烏蘭山陰以兵驟至通木特就擒索得禱木特責負恩罪禱木特請徙牧內屬遣扎哈沁得木齊招所百餘戶降薩喇勒檣禱木特至軍詔仍釋之入覲入覲京師上鑒歸志誠授內大臣賜冠服二十年詔與朝正會宴以通禱木特卒諭禱木特善視其戚屬時議征達瓦齊詔阿睦爾撒納爲定邊左副將軍以禱木參贊遣赴軍禱木特密奏曰阿睦爾撒納豺狼也雖降不可往往必爲殃上以不逆詐諭之詔授禱木特總管號準噶爾定扎哈沁包沁納賦例比年獻脯間年供牲贖喇嘛遇軍事令助詔如舊例恤免卹年賦禱木特與阿睦爾撒納會軍于額德里克特抵伊犁詔晉禱木特三等公爵賜信勇號賞雙眼孔雀翎四團龍服命常服之先是班第侯伊琿定偕禱木特議準噶爾善後事至是班第以禱木特兼

管扎哈沁包沁牧請仍至阿爾泰增喀爾喀藩籬允之尋撤大軍還扎哈沁兵三百遣歸牧禱木特以疾留伊犁聞阿睦爾撒納驟叛將脫歸一之兵衛爲逆黨哈丹等所遮脅之降不從擒赴阿睦爾撒納所阿睦爾撒納慰之禱木特唾而誓之爲阿睦爾撒納殺明年二月定西將軍策楞謀阿睦爾撒納戕禱木特以聞諭曰禱木特年就邁効力行間甚爲奮勉今逆賊戕之深爲憫惻其孫扎木禪令仍襲公爵大軍定伊犁械逆黨至訊得禱木特就死狀上製詩憫之扎木禪乾隆二十一年襲三等信勇公三月以阿睦爾撒納煽烏梁海梗赴哈薩克詔從北路將軍哈達勒烏梁海叛賊九月賜牧哲爾格西喇呼烏蘇諭曰札薩哈沁既與喀爾喀鄰牧卽設哨附近卡倫視喀爾喀例支領錢糧以資養贍二十四年從參贊大臣齊努渾追勦瑪哈沁至阿爾齊圖以兵先遇賊哈喇呼山奮擊之屢就擒獎賚幣二十五年扎木禪子門圖什扈蹕行圍乞喀爾喀親王成袞札布代請駝馬勿官給上以札哈沁甫定牧一之生計諭仍官給二十六年理藩院議禱木特歸誠後扎哈沁屬相繼附置佐領九得二千餘口

雖補總管未給印請以總管扎哈沁一旗總管印給扎木禪轄其衆尤之四十年扎木禪卒以扎哈沁原非禡木特之阿爾巴圖撤出佐領設一旗屬科布多參贊大臣其札木禪族丁及其阿爾巴圖三十餘戶亦附近科布多之烏裕克齊博多克齊游牧士四十五年五月諭將軍巴圖等不可令扎薩圖汗部侵占扎哈沁之烏英濟等處隙地嘉慶五年以扎木禪之孫托克托巴圖之屬已足百五十丁復編一佐領卽以托克托巴圖爲總管自後世資表十一年以前科布多參贊大臣恒博招民人開採是部煤窰議處道光二年定是部准給票與商民貿易六年回疆軍興是部捐助駝馬同治三年以烏魯木齊失陷調杜爾伯特諸部兵援古城而徹而歸四年以古城陷徹是部南境察罕通古等通古城三台歸沙扎蓋以北五台支應西路各差九年十月回匪陷烏里雅蘇台而去科布多告警參贊大臣奎昌等調是部二旗兵各五十名赴城收伍是部東南通扎薩克圖部南接新疆爲兵衝十一年十月回匪由是部犯科布多不得逞仍竄是部聚扎盟南境十二年九月匪擾察罕通古台站掠景廉軍營軍裝

偷銀竄新土爾其特貝子游牧布拉噶河一帶科城西南兩路台站紛紛逃散
匪又由巴里坤紅柳峽一帶竄踞札哈沁之博東齊十月科布多幫辦大臣保
英率兵敗之於博東齊以西匪竄札盟阿育爾公旗光緒二年四月回匪山布
倫托海竄沙札蓋地方額勒和布等派官兵勦之金順以索倫各隊扼紮烏魯
木湖塔截分竄其後烏魯木齊諸城克復是部始息警十二年甘肅新疆巡撫
劉錦棠以古城屬漢三塘驛來往商賈時有劫案咨科布多大臣飭屬緝匪沙
克都林扎布因奏漢三塘驛與科城所屬土爾扈特扎哈沁等旗地界毗連萬
里沙漠四通八達更兼白塔山商賈由此經過屢被劫掠又北八站一帶台搶
劫站之案亦層見迭出請獎扎哈沁旗內揀派駐察罕淖爾官兵移駐鄂隆布
拉克台保安商民搜捕盜匪允之二十六年卒匪事起邊戍戒嚴參贊大臣瑞
興檄是部信勇公策林多爾濟總管三保額魯特總管喇嘛札布明阿特總管
達什哲克博舉辦團防保護俄商貨物用弭邊畔二十九年閏五月一再請獎
奏入予策林多爾濟貝子銜三保等均二品頂戴三十一年五月瑞洵奏科布

多所轄札哈沁應用之五台尤爲大雪封塙復赴阿爾泰必由之路若使絡繹地當其衝札哈沁共二旗最爲瘠苦公一旗戶口甚稀剏辦大臣英秀由哈巴河回科布多臣赴新疆督辦收哈信勇公策林多爾濟調集烏拉奔走恐後保其子台吉棍布瓦齊爾請賞二品頂戴允之宣統三年參贊大臣溥鐸奏賑札哈沁大旗貧民三百五十六丁口總管旗貧民一千有一十一丁口將賞銀五千兩分別重輕散放下所司額魯特明阿特亦與是部同隸科布多額魯特本台吉達木拜屬達拜有罪削爵以其衆屬科布多游牧在新和碩特之西明阿特本出烏梁海復爲扎薩克圖漢部中左翼左左旗之屬乾隆三十年撤出設一旗屬科布多游牧在阿爾泰烏梁海之西乾隆五十七年設額魯特明阿特總管各一參領以下有差同治十年以防守科城及供大兵西進勞額魯特明阿特總管與扎哈沁信勇公及總管均予獎兩旗皆無扎薩克論者謂此蒙部之同於郡縣者也

土爾其特始祖元臣翁罕姓不著七傳至貝果鄂爾勒克子四長珠勒扎幹鄂

爾勒克生子一曰和鄂爾勒克居於雅爾之額什爾努拉地初衛拉特諸酋以伊犁爲會宗地各統所部不相屬準噶爾部酋巴圖爾琿台吉者游牧阿爾台恃其強欲役屬諸衛拉特和鄂爾勒克惡之挾族走俄羅斯牧額濟勒河俄羅斯因稱爲巴屬順治十二三四年和鄂爾勒克子書庫爾岱青伊勒登諾顏羅卜藏諾顏相繼遣使奉表貢書庫爾岱青子朋蘇克朋蘇克子阿玉奇世爲土爾其特部長至阿玉奇始自稱汗康熙中表貢不絕五十一年復遣使假道俄羅斯貢方物上嘉其誠且欲悉所部疆域道內閣侍郎圖理琛等齎敕往歷三載乃還附表奏謝自是時因俄羅斯請於中朝遣所部人赴藏熬茶乾隆二十一年所部使吹扎布等入覲稱奉其汗惇羅布喇什令假道俄羅斯三載方至請赴唐古忒謁達賴喇嘛遣官護往二十二年自唐古忒還頒惇羅布喇什幣物二十三年伊犁平有附牧伊犁之士爾扈特族台吉舍稜等奔額濟勒河既而惇羅布喇什卒子渥巴錫嗣爲汗三十五年舍稜誘渥巴錫攜所部之士爾扈特和碩特輝特杜爾伯特等人衆於十月越俄羅斯之坑格圖喇納卡倫而

南俄羅斯遣兵追之不及渥巴錫既入國境由巴爾噶什淖爾而進至克齊克
玉子地方與哈薩克台吉額勒里納拉里之眾相持伊犁將軍令哈薩克毋許
土爾扈特越游牧而行渥巴錫遂向沙喇伯可而進布魯特羣起劫之渥巴錫
走沙喇伯可之北戈壁無水草人皆取馬牛之血而飲瘟疫大作死者三十萬
牲畜十存三四三十六年至他木哈地方近內地卡倫布魯特始歛兵退將軍
伊勒因遣侍衛普濟問來意渥巴錫與其台吉喇嘛計議數日始定以投誠爲
詞獻其祖所受明永樂八年漢篆敕封玉印及玉器宣密磁器等物先是上聞
渥巴錫之來命烏什參贊大臣舒赫德往伊犁經紀其事至是因受其降存七
萬餘衆賑以米麥牛羊茶布棉裘之屬用帑二十萬兩三十六年九月渥巴錫
等入覲熱河封渥巴錫舊土爾扈特卓里克圖汗渥巴錫從子額墨根烏巴什
固山巴圖魯圖貝子拜濟瑚輔國公從弟伯爾哈什哈一等台吉均授扎薩克
各編一旗四十七年均予世襲罔替初分所部爲四路南路凡四旗曰扎薩克
卓理克圖汗旗曰中旗曰右旗曰左旗三十七年賜牧齊爾三十八年徙牧珠

勒都斯綠喀喇沙爾辦事大臣與北路三旗東路二旗西路一旗統受節制於伊犁將軍嘉慶四年高宗大行舊土爾扈特汗霍紹齊之母請納俸諷經不許道光六年回匪張格爾擾喀什噶爾等城徵是路土爾扈特及和碩特蒙兵赴阿克蘇一帶助剿十月擊退犯渾巴什河之賊資貝子巴爾達拉什台吉烏圖那遜等及兵丁等緞疋翎頂銀兩有差自是回疆有事皆徵其兵十年十一月以貝子巴爾丹拉什率兵援喀英等城卒于軍命其子蒙庫那遜晉襲貝勒十八年以護舊是部南路盟長福晉喇什不勒指修喀喇沙爾城垣予獎二十一年六月又獻伊拉里克水源却之二十七年布魯特擾喀什噶爾等城亦徵是路蒙兵防勦事定撤回同治三年回匪變亂庫車失陷徵是路兵勦之不利退守游牧是年喀喇沙爾等城均失陷是路部落屢與回匪接戰被蹂躪離散六年十二月盟長布雅庫勒哲圖依請赴京允之命烏里雅蘇台將軍麟興等設法安插其部落游牧七年三月布雅庫勒依圖請率屬勦回逆上嘉之命赴布倫托海候李雲麟酌辦並飭戶部籌撥歷年俸銀俸緞李雲麟接濟所屬游

牧人衆六月以舊土爾扈特蒙兵接仗失利移至大小珠勒都斯催布雅庫勒哲依圖赴布倫托海命明珠等接濟照料十一月麟興奏布雅庫勒哲依圖困苦形情下所司議八年三月賚舊土爾扈特汗布雅庫勒哲依圖貝勒固囑扎布輔國公曼吉多爾濟等旗銀二萬兩六月命烏里雅蘇台將軍福濟安插舊土爾扈特汗布雅哲庫勒依圖及隨帶官兵光緒元年布雅庫勒哲依圖卒以福晉恩克巴圖署盟長二年八月撥部庫銀予恩克巴圖撫綏人衆擇地安插三年劉錦棠等軍復喀喇沙爾四年十二月伊犁將軍金順奏土爾扈特南部落人衆自逆回構亂以來逃散伊犁空吉斯及西湖等處署盟長派員前往收集約計一萬餘人現已移回珠爾都斯游牧諭以其部人衆困苦賞銀四萬兩之由左宗棠給發光緒八年是部難民由伊犁續歸三百三十餘丁口舊有府第兵燹之後尙未修復大小水渠年久墊淤欽差大臣劉錦棠奏恩克巴圖請賑恤並籌借銀兩權爲籌撥銀一萬兩作爲渠工宅第經費喀喇沙爾善後局員照章給賑通融接濟牛種待賑丁口種俾資耕作請分別核銷及作正開銷

允之九年設新疆喀喇沙爾直隸廳撫民同知兼理事銜兼管土爾扈特游牧事宜十三年新疆巡撫劉錦棠奏土爾扈特等蒙衆向隸辦事領隊管轄者應改歸地方官管轄恐各蒙民未能戶曉請飭理藩院申明新設定制轉行各蒙部下所司知之二十二年三月甘肅回匪西竄出關伊犁將軍長庚電奏賊窺珠勒都斯檄南部落署盟長福晉色里特博勒噶丹等揀選有槍馬之蒙兵五百名由貝勒恭噶那木扎勒統之分派參領奔津等各帶官兵駐哈布齊沿山口及哈哈爾巴達罕達蘭達巴罕等處扼珠勒都斯之東逼喀喇沙爾庫爾勒要隘八月事定徹歸新疆置省後舊土爾扈特諸部仍隸伊犁將軍俸銀俸緞均由伊犁發給蒙古惟舊土爾扈特等部之在新疆者汗王公扎薩克等卒嬖子不及歲以前皆由已歿汗王公等之妻或母署印有鹽有鑛地兼耕牧佐領共五十四北路凡三旗盟曰烏訥恩素珠克圖在塔爾巴哈台城東當金山之西南雀博克薩里東噶扎爾巴什諾爾南戈壁西察漢鄂博北額爾齊斯河渥巴錫族子策伯克多爾濟等乾隆三十六年從渥巴錫來歸獻金削刀及色爾

克斯馬三十七年入覲封策伯克多爾濟扎薩克和碩布延圖親王授其弟依奇哩扎薩克一等台吉轄右翼賜牧霍博克薩里爲舊土爾扈特北路以策伯克多爾濟領之授盟長四十年授奇哩布弟阿克薩哈勒扎薩克一等台吉轄左翼四十三年策伯克多爾濟卒奇哩布襲銷右翼印五十年授策伯克多爾濟之子公品級一等台吉恭格車稜扎薩克詔轄其父屬衆別鑄右翼扎薩克印賜之五十七年封輔國公道光二年卒子多爾濟那木扎勒降襲公品級扎薩克一等台吉同治四年塔城回變親王策林拉布坦以調兵遲延爲參贊大臣錫霖劾革其爵以捐輸復之九年奎昌等立塔爾巴哈台新界鄂博奏飭親王策林拉布坦圖普仲克什克扎薩克喇扎爾巴達爾隨時留意偵察舊界亦有割棄十二年十月回匪竄擾是部薩巴爾山地方劫掠牲畜衣物烏素圖等三台逃散十二月參贊大臣英廉奏匪已遠竄飭策林拉布坦等妥爲安插被難蒙民一面將原設七台照舊安設尋論設台站之勞予黃纒宣統元年以阿爾泰烏梁海復在是部薩里山陰度冬提每年租馬十成之一給是部三旗作

水草之租是部金鑊頗著名地雜耕牧有佐領十四東路凡二旗跨濟爾哈朗河東至屯河接甘肅綏來南南山西庫爾喀喇烏蘇北戈壁渥巴錫族弟巴木巴爾等從渥巴錫來歸三十七年入覲熱河封扎薩克多羅畢錫埒勒圖郡王弟奇布騰固山依特勒貝子盟名亦曰烏訥恩素珠克圖初隸庫爾喀喇烏蘇大臣統受伊犁將軍節制同治末俄人以北路舊土爾扈特取所屬哈薩克馬駝執是部貝子普爾普噶丹爲質尋釋之光緒初給撫恤銀一萬兩十一年設庫爾喀喇烏蘇同知兼理事銜釐是部民蒙交涉事件清末粵郡王者帕勒塔嘗請出洋又入貴胃學堂以本旗事爲伊犁將軍廣福勅議處是部共有左領七西路一旗當天山之北精河東岸東精河屯田南哈什山陰西托霍木岡台北喀喇塔拉額西柯卓爾渥巴錫族叔父默們圖從渥巴錫來歸乾隆三十七年入覲熱河封濟扎薩克濟爾噶朗貝勒賜牧精河受伊犁將軍節制咸豐十年貝勒鄂齊爾以捐餉予雙眼花翎光緒初以被擾予撫恤銀一萬兩十三年設精河同知兼理事銜釐是部民蒙交涉事有佐領四

新土爾扈特在科布多西南當金山南烏隆古河之東東新和碩特南胡圖斯山西與北均阿爾泰烏梁海東南扎哈沁土爾扈特翁罕十四世孫舍稜率諸昆弟附牧伊犁爲準噶爾屬台吉大軍征準噶爾獲達瓦齊阿睦爾撒納等以叛相次誅滅舍稜獨抗不降竄匿庫庫烏蘇喀喇塔拉境乾隆二十三年詔定邊將軍成衮扎布等剿之舍稜奔俄羅斯我軍追及之於勒布什河源舍稜乃詭約降計戕我副都統唐喀祿馳踰喀喇瑪嶺歸額濟勒土爾扈特游牧三十年六年復誘其汗渥巴錫來踞伊犁抵他木哈知內備固計無所出不得已隨渥巴錫歸順詔宥舍稜罪三十七年與從子沙喇扣肯入覲熱河封舍稜多羅弼里克圖郡王沙喇扣肯烏察喇勒圖貝子均授扎薩克舍稜所曰部左翼旗沙喇扣肯曰右翼旗定盟名曰青色特啓勒圖舍稜充盟長沙喇扣肯副之四十八年詔世襲罔替綠科布多參贊大臣道光六年回疆軍興是部輸馬駝助軍咸豐三年是部王貝子等請捐助軍需溫旨卻之同治三年徵是部兵援古城等城以散潰徹之六年於是部之布倫托海地方設辦事大臣以李雲麟爲之

七年五月布倫托海兵民潰變李雲麟走青格里河諭福濟錫綸前往查辦明
瑞棍噶扎拉參曉諭解散七月布倫托海變民竄烏龍古河九月以棍噶扎拉
參挑噶爾爲喇嘛成軍諭福濟等督率進勦布倫托海變民撥部庫銀十萬兩
解科布多爲布倫托海勦匪及賑濟難民之用調福濟爲布倫托海辦事大臣
十月以守科布多城出力予是部郡王凌扎棟魯布親王銜十二月以是部仍
屬科布多管轄八年二月以哈薩克圍殺布倫托海變民命是部郡王凌扎棟
魯布進勦四月福濟遼烏里雅蘇台將軍文碩代之七月布倫扎海變民傷俄
國卡兵棍噶扎拉參營于克林河諭福濟等疾籌進勦飭知遵行七月棍噶扎
拉參勦變民于和博克托里勝之八月棍噶扎拉參復布倫托海變民降收撫
之賊首張恩等伏誅諭福濟等籌給布倫托海難民口食九月命塔城額魯特
暫安舊居阿爾泰山俗衆居青格里河十月徙布倫托海人衆于爾阿爾泰山
予布倫托海在防索倫及綠營官兵銀兩十一月裁新設布倫托海辦事大臣
撤回旗綠官兵命索倫額魯特領隊大臣及棍噶扎拉參應辦事宜統歸科布

多參贊大臣經理改派奎昌辦布倫托海與俄分界事宜十二年九月肅州回匪竄是部貝子旗布拉噶河一帶科布多參贊大臣托倫布等調回駐察罕淖爾之黑龍江馬隊暨蒙古馬隊分赴布拉噶河防勦十一月烏魯木齊領隊大臣錫綸奏七月十六日率所募民勇自阿爾泰山南移營烏龍古河南岸聞東路布爾根河一帶有警科布多屬之扎哈沁及和碩特土爾扈特邊界皆被擾阿爾泰山附近之烏梁海台站逃散匪由和碩特土爾扈特等喇嘛營子西竄至青格里河十二月錫綸奏回匪擾及烏梁海部落臣帶民勇民團追匪至噶扎爾巴爾淖爾匪已由薩勒布爾山南竄沙山子卽由山北取道布凌河疾馳至霍博克河上游之庫克辛倉探得匪在河下游之科科墨頓林木中紮營五座於夜分潛師進薄賊壘擊潰賊三營又取後一營匪衆敗遁尋由阿雅爾淖爾竄綏來縣之大小拐回瑪那斯科布多暫辦大臣保英奏十月十九日親率馬隊由吉慶淖爾西行二十七抵土爾扈特之青格里河賊竄布倫托海經錫綸進勦斬獲甚多匪已西竄臣將官兵駐青格里河檄飭烏梁海土爾扈特和碩特

扎哈沁速將軍台移回原處安設其後烏魯木齊瑪納斯諸城克復是部始息
警光緒九年劃科城中俄界劃辦大臣額爾慶額安插歸中國之哈薩克以奎
峒山左右暨哈巴河源諸山爲夏季游牧以阿拉別克河東暨果里子克河哈
巴河阿拉克台爲冬季游牧實皆是部地二十九年瑞洵奏創修托倫布海渠
工開辦屯田給土爾扈特王旗貝子旗借用蛇隻價銀飭扎哈沁土爾扈特烏
梁海左右翼擇水草較好地從扎哈沁沙紮蓋台起至布倫托海止安設十三
台二十九年閏五月錄科布多所屬各旗保護俄商遺棄貨物有神大局之勞
子土爾扈特正盟長扎薩克郡王密錫克棟古魯布紫韁副盟長扎薩克貝子
瑪克蘇爾扎布雙眼花翎三十二年十二月劃科布多阿爾泰分轄之界以部
是二旗及新和碩特一旗阿爾泰烏梁海七旗均隸阿爾泰是部地兼耕牧有
金鑛布爾津河通輪船共有佐領三近是部者有哈弼察克新和碩特乾隆三
十六年和碩特台吉巴雅爾瑚之族蒙貧卒率屬來歸願附新土爾扈特貝
子沙喇扣肯之旗詔子一等台吉給半佐領令其附居五十七年移杜爾伯特

近處哈密察克游牧嘉慶元年科布多參贊大臣奏蒙賞妻察彥率子布產克什克詣言生齒日繁求給扎薩克印不食俸道光六年回疆軍興後至咸豐初是部皆借杜爾伯特諸部指馬駝指餉助軍同治末回匪北竄是部與新土爾扈特同被撥署伊犁將軍榮全以商論伊犁事自科布多西行是部設台供支光緒二十九年錄庚子舉辦防團保護俄貨之勞予扎薩克台克什克布彥鎮國公銜三十三年正月卒以子達木鼎第得恩襲初有出缺請旨之例實亦世襲牧地東扎沁南與西皆新土爾扈特北阿爾泰烏梁海有佐領一

和碩特部在新疆焉耆府北東烏沙克塔爾南開都河西小珠勒都斯北察罕通格山舊爲四衛拉特之一系出元太祖弟哈巴圖哈薩爾有博貝密爾咱者始稱汗子哈尼諾顏洪果爾嗣之有子六牧青海西套伊犁諸境詳青海厄魯特部傳其第三子昆都倫烏巴什第四子圖魯拜琥裔蕃衍圖魯拜琥號顧寶汗其裔或稱青海厄魯特設扎薩克二十有一或稱阿拉善厄魯特設扎薩克一或隸察哈爾旗設府三皆不著和碩特部昆都倫烏巴什號都爾格齊諾顏

子十六長邁瑪達賴烏巴什次烏巴什琿台吉次多爾濟次額爾克岱青鄂克
綽特布次第巴卓哩克圖次噶布楚諾顏次蒙固次青巴圖爾次伊納克巴圖
爾次伊勒察克次賽巴克次哈喇庫濟次羅卜藏達什次塔爾巴次色稜次朋
素克今和碩特許扎薩克四皆多爾濟及額爾克岱青鄂克綽特布裔崇德七
年昆都倫烏巴什遣索諾木從達賴喇嘛使貢駝馬賜布幣及朝鮮貢物順治
八年貢所產馬及黑狐皮九年復貢駝馬嗣數遣使至康熙十六年邁瑪達賴
烏巴什子丹津琿台吉遣達爾漢宰桑入貢二十一年復遣杭勒岱等至諸昆
弟遣使從凡百餘人二十四年定四衛拉特貢例使入關以二百人爲額諭所
部知之詳杜爾伯特部傳時準噶爾稍強和碩特族懼其威咸奉令後噶爾丹
亂定顧實汗諸子姓游牧青海者咸內附噶爾丹從子策妄阿喇布坦偪和碩
特族與同處表請青海復舊業如噶爾丹時將陰謀爲己屬上燭其奸諭責之
令遣和碩特歸舊牧勿私據不從有羅卜藏車凌者多爾濟曾孫也策妄阿喇
布坦以女妻之雍正八年靖邊大將軍傅爾丹屯科布多將擊準噶爾或告曰

噶爾丹策凌以兵萬授羅卜藏車凌遣禦哈薩克設汛阿里馬圖沙拉伯勒境
羅卜藏車凌棄之率戶三千餘山噶斯走青海將內附噶爾丹策凌遣宰桑烏
喇特巴哈曼集等追之爲所敗復遣喀喇沁宰桑都噶爾往襲不之及也傅爾
丹以聞詔副都統達鼐偵防噶斯路俟羅卜藏車凌降遣入覲以兵監從衆置
內汛勿墮詭降計久之羅卜藏車凌不至乾隆二十年大軍征達瓦齊抵伊犁
有善披嶺集賽之得木齊蘇克都爾格齊霍什哈及古里特鄂拓克之得木齊
和通喀喇博羅莽伊什克特咱瑪博勒等告舊爲羅卜藏車凌屬獻籍六百
餘戶羅卜藏車凌子曰諾爾布敦多克游牧額琳哈畢爾噶遣長子鄂齊爾馳
降定北將軍班第遣招其族台吉三濟特聞之獻籍三百戶丹津琿台吉子曰
阿喇布坦有子二長噶爾丹敦多布生沙克都爾曼濟次敦多布車凌生明噶
特達瓦齊善沙克都爾曼濟倚任之小策凌敦多卜孫訥默庫濟爾噶爾與達
瓦齊構兵沙克都爾曼濟擊之殲其拳班第等至達瓦齊竄格登沙克都曼爾
濟乃降有班珠爾者頓實汗裔也與輝特阿睦爾撒納異父同母陰比之前避

達瓦齊亂來歸授多羅郡王詔俟厄魯特定將以爲和碩特汗時從大軍抵伊犁私奪諾爾布敦多克沙克都爾曼濟諸台吉屬產班第禁之乃稍戢尋定入覲次以沙克都爾曼濟及班珠爾列初班三濟特鄂齊爾次之阿睦爾撒納阻其行詭稱沙克都爾曼濟將叛迎達瓦齊請以班珠爾屯特穆爾圖諾爾護降衆瑛第斥詞妄班珠爾詭入覲赴塔密爾牧取阿睦爾撒納孳謀借遁參贊大臣阿蘭泰擒之沙克都爾曼濟入覲避暑山莊上御潛泊敬誠殿受朝詔封和碩特汗授盟長諭董所屬勤養教圖生聚三濟特鄂齊爾繼至詔授三濟特扎薩克一等台吉鄂齊爾圖散一等台吉遣歸牧定西將軍策楞將以大兵勦阿睦爾撒納詔沙克都爾曼濟往會甫就道謀者以阿睦爾撒納據伊犁告諭遣親信宰桑馳諭所部備兵勿爲逆煽而以身從大軍擊賊班珠爾械至禁獄所請遣三濟特鄂齊爾書令和碩特衆分勦阿逆三濟特旣得書言諾爾布敦多克沙克都爾曼濟皆鄰牧且族台吉瑪尼巴圖巴蘇泰瑪賚烏巴什弩庫特圖魯孟克阿穆爾弩斯海薩望等皆無異志當以書遣之鄂齊爾稱願歸告父共

勦逆而我副將軍薩拉爾集伊犁宰桑等定議約諾爾布敦多克及沙克都爾曼濟子圖們以兵至博囉塔拉布爾哈蘇臺園勒奇嶺勦阿睦爾撒納諾爾布敦多克圖們各遣使至巴里坤告故諾爾布敦多克表曰臣父羅卜藏車凌前噶爾丹策凌時謀內附不獲聞大軍征達瓦齊臣族班珠爾倚阿睦爾撒納奪臣屬臣願奮志勦賊上嘉其誠詔封公府以班珠爾所奪給之班珠爾尋伏誅二十一年諾爾布敦多克來歸薩拉爾等既定謀阿睦爾撒納偵知之先備諾爾布敦多克以兵擊諸伊犁之諾羅斯哈濟拜牲不勝借薩拉爾間道行由珠勒都斯至巴里時沙克都爾曼濟抵策楞軍詔令遺書其子圖們以兵護牧書未達明噶特附阿睦爾撒納叛脅所部衆圖們不之從挈戚屬抵珠勒都斯請內徙上憫之詔封多羅貝勒賜銀千兩賞雙眼孔雀翎諭山額琳哈畢爾噶往會沙克都爾曼濟有圖什墨勒厄爾哲者從大軍勦阿睦爾撒納中道強取諾爾布敦多克屬詔責之察所取以歸諾爾布敦多克及子鄂齊爾尋相繼卒詔以鄂齊爾弟博爾和津襲公爵諭曰諾爾布敦多克舊收哈薩克接壤恐或掠

之若欲徒歸額琳哈畢爾噶惟其便沙克都爾曼濟攜子圖們及博爾和津等
由珠勒都斯至巴里坤乞屯牧近地副都統雅爾哈善以聞諭曰沙克都爾曼
齊以舊牧乏生計跋涉遠至殊堪憫惻準噶爾頻年不靖諸部生計維艱然使
台吉等各收其屬安處游牧以耕畜爲業善自謀生不數年間可復舊業今沙
克都爾曼濟等雖暫處巴里坤究非故土難以久處又喀爾喀附近之和碩特
杜爾伯特輝特等俱將遣歸舊牧且諭令各安生業嚴戢盜賊沙克都爾曼濟
等自宜仍歸舊牧但甫從遠道至遽令之歸不免困頓可令暫處巴里坤附近
地賞給糧米如戶口數復遣使諭沙克都爾曼濟及綽囉斯汗噶爾藏多爾濟
輝特汗巴雅爾曰爾等自入覲歸牧後遊朕諭旨約束所屬守分安居已諭一
載甚勞遠念今特遣官存問并令齎賜食物佩飾以示優眷逆賊阿睦爾撒納
見竄匿哈薩克苟延殘喘朕遣官兵征勦經年時屆寒冬暫行徹還第逆賊狡
詐百出儻遣人赴爾等游牧詭計煽惑爾等卽行擒獻至沙克都爾曼濟奏請
游牧巴里坤附近地已諭酌賜口糧俟明年春復賞給籽種耕耨庾集額卜齊布

拉克地秋收後遣歸舊牧爾等其善自謀生永享昇平之福沙克都爾曼濟等
獻所部盜馬者請論罪諭曰厄魯特劫奪成風不可不嚴加懲創爾等擒獲竊
賊解送內地甚屬恭順嗣後可自治之復以博爾和津幼不更事諭沙克都爾
曼濟留心護視并令其族摩羅及宰桑新登等暫理牧務既而諸衛拉特復不
靖巴雅爾詭稱沙克都爾曼濟掠所部牧將以兵襲巴里坤噶爾藏多爾濟及
兄子扎納噶爾布叛擾邊境有普爾普者以其主沙克都爾曼濟私通扎納噶
爾布告詔雅爾哈善察之時沙克都爾曼濟設汛哨內防禦遣諜赴巴里坤偵
大軍狀子圖們死不以告雅爾哈善召之稱病不至疑果叛背抵其營殲之斬
衆四千餘察獲博爾和津奏請安置地詔徙京師停襲公爵沙克都爾曼濟弟
桑濟竄徙額爾濟斯境掠奉使杜爾伯特之侍衛佛保駝馬佛保奮擊之乃逸
杜爾伯特汗車凌造親王車凌烏巴什等追勦桑濟走死和碩特叛黨始靖而
其族多爾濟之裔恭格等有偕土爾扈特部游牧俄羅斯之額濟勒河境者三
十六年從土爾扈特汗渥巴錫自俄羅斯來歸尋入覲詔封恭格爲土謝圖貝

勒族叔父雅蘭爲阿穆爾哈貴貝子授族弟諾海及巴雅爾拉瑚一等台吉均爲扎薩克各編一旗賜盟名曰巴圖色特啓勒圖餘悉如土爾扈特例三十七年賜牧珠勒都斯四十年設正副盟長各一嘉慶二年恭格從子博騰特克卒無嗣十一月以所管佐領分給貝子鄂齊爾二扎薩克台吉齊業齊三烏爾圖那遜一除其得道光六年回疆軍興徵是部兵協勦收回匪于阿克蘇之渾巴什什河子緞疋銀兩及翎頂各有差自是回疆有事皆借土爾扈特兵應徵調統隸有伊犁將軍同治三年回亂是部被蹂躪戶口林散失大半中路左旗扎薩克台吉喇什德勒克率餘衆避居博爾圖山中竭力保守光緒三年劉錦棠收復托克遜喇什德勒克謁劉錦棠八月進兵以後隨同官軍馳驅於地勢險夷賊情虛實水道深淺具陳實狀師逾開都河遂遷其部於河東欽差大臣左宗棠請獎疏入予花翎先是中旗貝子多爾那齊那木札勒右旗扎薩克洞魯布旺扎勒皆避出至是始歸所牧是部佐領尙呈左宗棠請以其兩旗人衆隸喇什德勒克事尋寢光緒八年設喀喇沙爾直隸同知兼理事銜釐是部蒙民

交涉事二十二年甘肅回匪竄出關伊犁將軍長庚檄是部貝子棍布扎普派
扎薩克台吉貢噶那木扎勒統兵駐都木達塔什哈地方扼博斯騰淖爾通羅
布淖爾之徑事定徹歸其地出產同舊土爾扈特南部落佐領共十一

清史稿

列傳

藩部七

唐努烏梁海

阿爾泰烏梁海

阿爾泰淖爾烏梁海

唐努烏梁海在烏里雅蘇台之北東南土謝圖汗部南賽音諾顏部西阿爾泰烏梁海西南扎薩克圖汗部北俄羅斯有總管五曰唐努曰薩拉吉克曰托錦曰庫布蘇庫勒諾爾曰奇木奇克河康熙五十四年扎薩克圖汗部和托輝特輔國公博貝隨大軍赴推河防準噶爾策妄阿拉布坦言準噶爾不靖恃烏梁海障之乞往招若抗卽以兵取扎薩克台吉濟納彌達阿里雅及根敦羅卜藏克兵俱習戰請與同往上驢其議從之九月烏梁海頭目和羅爾邁率屬降先是和羅爾邁居吹河嘗以越界射獵爲博貝縛獻上宥其罪論還巢至是將遣子瑚洛處納請降博貝至因遷其游牧赴特斯冬和羅爾邁遁博貝追至呼爾罕什巴爾執之五十九年博貝擒烏梁海逃衆晉貝勒時從征西將軍祁里德

軍六十年六月議政王大臣議覆祁里德新收烏梁海二千五百三十名應送至巴顏諸爾克地方居住令車臣汗等旗分派兵三百名並派台吉協同駐紮防守雍正二年諭曰朕詢貝勒博貝管轄烏梁海何以資生據奏在將軍祁里德處借餉一萬八千餘兩買牲分給各得產業今勝於昔所有借項自以貝勒俸逐年扣抵朕思烏梁海俱朕之百姓豈有朕之百姓而借餉於朕之理所借銀兩不必扣還諭祁德里知之三年烏梁海和羅爾邁復遁由阿哩克竄準噶爾界博貝遣子額璘沁由托濟邀擒而自赴克木克木齊克緝叛黨誅之初額魯特與喀爾喀構兵時錯處科布多烏蘭固木噶爾丹既滅喀爾喀西境直抵阿爾泰自唐努山陰之克木克木齊克至博木等處皆博貝及來歸之額魯特貝凌旺布所屬烏梁海游牧雍正四年策旺阿拉布拉言克木克木齊克舊隸準噶爾乞還上不許慮伺間賂烏梁海詔博貝率所部兵千隨前鋒統領定壽駐唐努山陽特斯地方防護之尋諭理藩院曰朕詳思克木克木齊克烏梁海皆博貝所屬和羅爾邁既已就擒交博貝撫恤居之公所但念此等人向在喀

爾喀邊外林木中射獵爲生與準噶爾所屬烏梁海接壤又與俄羅斯連界宜令博貝等同大臣前往曉諭令自爲預備以防不虞三月命大臣一員帶布帛茶葉賞克木克木齊克地方烏梁海並令揀老成服衆之人作爲首領雍正五年額駙策凌等與俄羅斯訂約自恰克圖鄂爾輝圖兩間爲界所立之鄂博迤西至肯哲馮達霍呢音嶺克木克木齊克之博木沙弼納嶺循此山梁由正中分中劃界其兩邊各取五貂之烏梁海仍合照舊各歸其主彼此各征一貂之烏梁海自定界之日將各取一貂之處停止乾隆十六年以和托輝特扎薩克貝勒青衮咱卜縱所屬人私出汎界與準噶爾回衆貿易致潛居烏梁海奪貝勒詔額璘沁襲其爵定烏梁海出入汎界例二十一年青衮咱卜脅烏梁海叛大兵至皆棄去二十五年鑄唐努烏梁海總管印給之嘉慶二年烏里雅蘇臺參贊大臣額樂春以需索烏梁海奪職治罪道光三年定禁烏梁海與商民貿易例以山西民人私向烏梁海買取羊隻涉訟二十四年六月烏里雅蘇臺將桂輪劾總管垂敦扎布需索無厭命奪職咸豐年奏唐努烏梁海界址十年與

俄國定界約是部之沙賓達巴哈實爲西疆劃界之第一地段同治三年十一月烏里雅蘇臺將軍明誼等奏唐努烏梁海游牧內俄使前開議單載唐努鄂拉達巴哈卽係唐努山嶺自沙賓達巴哈界牌起先往西後往南亦據該使呈繪圖誌有順薩彥山嶺至奎屯鄂博所有界限地名我國舊存圖內雖無其地名然據該使所指方向續經庫倫辦事大臣文盛送雍正五年已定交界圖誌名目雖殊界限大致相似唐努烏梁海游牧雖有被俄人包去之嫌與西二盟游牧無礙明年立界時俟與麟興車林敦多布等妥商辦理四年八月麟興等奏據委員岳嵩武稟報與唐努烏梁海總管凡齊爾馳赴博果素克大壩屢勘起沿站按圖詳查行至唐努鄂拉達巴哈核與俄國所畫唐努鄂拉達巴哈邊界相符除薩彥山因無路徑不能履勘其唐努鄂拉達巴哈及邊境應分之珠噶淖爾塔斯啓勒山哈喇塔蘇爾山德布色克哈山數處擇擬立界處所繪會勘圖誌呈閱時俄立界使臣以事不能至九月明誼等以軍務緊急請緩約俄使立界六年俄人遂越界至總管邁達爾游牧內烏克果勒地方建屋種地總

理各國事務衙門照會俄使始由庫倫俄官行文送之回國是年廷旨促麟興等建立西疆毗連俄境界牌鄂博六月專命榮全迅與俄官會立烏里雅蘇台邊卡界牌鄂博八年五月榮全與俄使穆魯木策夫至是部西南之賽留格木山嶺會立牌博於是月二十六日起行順賽留格木嶺至是部西南邊境盡處之博果蘇克壩立第一界牌鄂博科城立牌博於南俄國立牌博於西由此向東北約十里名塔斯啓勒山於山頂立第二牌博又向東北約九十里至珠噶淖爾俄使言只就珠噶淖爾迤北數十里唐努山之察布濟壩止建立鄂博由此直向西北統至沙賓達巴哈路既便捷尤易行走榮全以俄使所指之路俱係是部游牧內地若照俄使所議不惟與原圖大不相符且將是部游牧包去大半向俄使反復開導仍如原圖於珠噶淖爾東南之哈爾根山立第三牌博順淖爾北岸約二十餘里至唐努山南察布齊雅壩立第四牌博沿唐努山南向西過莫多圖河扎勒都倫河烏爾圖河察罕扎克蘇圖河順哈喇塔蘇爾海山至沙克魯河轉向東北約二百五十餘里至庫色爾壩係是部西方邊界

立第五牌博向西北九十餘里至唐努鄂拉達巴哈末處過哈喇河偏西山下楚拉察水流之處立第六牌博向北又東順薩彥山過瑪納瑚河蒙納克河浩拉什河由喀喇淖爾至蘇爾大壩約一百五十里立第七牌博向北又東約三百六十餘里山脈連貫直至沙賓達巴哈於舊牌博之東山頂上立第八牌博照原圖至賽留格木山博果蘇克壩上紅線以左爲中國地紅線以右爲俄國地至六月二十二日竣事而是部阿爾泰河阿穆哈河區域皆入于俄光緒五年烏里雅蘇台將軍以奇木齊克河總管報俄商在唐努烏梁海屬建蓋行棧數處及春季以來有俄人或三五十人或八九十人不等在奇木齊克河北一帶中唐努山內刨挖金砂例應禁止咨總理各國事務衙門照會俄署使凱陽德轉飭邊官查禁七年五月烏里雅蘇台將軍以俄人在薩爾魯克地方居住禁立木棚十處附近挖過金砂大小凡一百餘處照會俄駐庫領事迅飭邊界官嚴禁十四年四月烏里雅蘇台將軍杜嘎爾奏所轄唐努烏梁海屬地邊外自柏郭蘇克西北至沙賓達巴罕中國設立界牌每年夏季派員會同查閱

其嶺一東一南至烏里雅蘇台卽嶺之左歸中國屬載在條約乃俄入竟於沙
賓達巴罕以東雀呢章達巴罕以西唐努所屬爾里黨薩布塔爾都不達果勒
畢爾里克荊格等河岸地方前經查驗過俄人挖金共四十五處至今仍在薩
布塔爾車爾里克兩處附近河岸開挖甚多烏克多倫兩河地方俄人明固賴
等任意開墾地畝長一千三百餘廣尺寬八百二十餘廣尺俄人雅固爾等於
薩拉塔木博木額奇布拉克多倫烏克車爾里克托勒博薩斯多克密崗喀勒
扎庫勒哈達努額奇依斯克木阿瑪阿克河口吉爾噶瓠河口吉爾扎拉克等
十五處建蓋堅屋南入我境至數百之多本年派佐領榮昌等往烏梁海吉爾
拉里克地方會俄官辦論挖金蓋房種地各案俄官一味支吾執意不辦應由
總理各國事務衙門逐件查復旋由總理事務衙門覆奏請飭將軍等詳勘界
限研究根由援據約章與俄會竭力辨論倘彼堅執或應知照駐俄使臣嚴請
外部妥籌辦法或卽佔給蓋房之費令從速遷徙由將軍等就近相機籌定奏
明辦理十月祥麟等奏覆派吉玉等由烏梁海印務處於六月自蔭木噶拉泰

起程履勘車爾里克等處往返兩月有餘已將俄人在境內挖金蓋房種地三
事詳細查明繕單入告命總理各國事務衙門照會俄使將越界在唐努烏梁
海挖金蓋房種地之背約俄人遷回本國二十五年八月烏里雅蘇台參贊大
臣志銳以奇木齊克河總管請給印奏入命連順察看情形奏明辦理尋覆奏
以奇木奇克河與唐努總管相隔實在千里之外中間橫亘巨賽音諾顏部之額
魯特扎薩克貝子達克丹多爾濟所屬烏梁海遇有齟齬文報不通凡事轉報
總管未能直達烏城奇木奇克河實有二千一十三戶丁口已幾萬人唐努總
管每年勅派各情亦所恆有其他毗連俄界交涉事多既十蘇木連結懇求是
與唐努總管其心已離兩不相下倘有事故亦難收拾若將數十年仰希朝廷
之恩一旦下頒必能自固藩籬爲我屏蔽况有東烏梁海請印在前似難以不
符體制爲解請仍實給印信得旨如所請二十六年詔連順等備邊時拳匪事
起中外人心惶惑連順檄唐努烏梁海總管棍布多爾濟薩拉吉克烏梁海總
管巴勒錫呢瑪托錫烏梁海總管凌魁庫布蘇庫勒諾爾烏梁海總管克什克

濟爾噶勒奇木克河烏梁海總管海都布調兵練團嚴密舉辦棍布多爾濟等均能刻日成軍復籌糧軍食擇要加兵防守善待俄商毋生邊衅二十八年十二月連順等再請獎叙疏入予克什克濟爾噶勒二品頂戴海都布二品花翎是年連順以烏梁海向風沐化幾二百年直興喀爾喀蒙古無異我國商民仍守舊規不敢違禁潛往貿易至俄商之在烏梁海貿易者不計其數建蓋房屋常年居住每年收買鹿茸狐狼水獺捨利獾貂皮灰鼠爲款甚鉅致烏梁來烏域呈交貢皮時竟至無貨可以貿易惟有變通辦理如在烏城貿易商民願赴烏梁海貿易者准報官前往勿禁仍由將軍衙門照章酌給六個月限票並嚴飭守卡官兵認真稽查不准挾帶違禁之物尤之宣統元年烏里雅蘇台將軍堃岫等以奇木克河總管海都布率奏本旗十蘇木公揀海都布長子達魯噶布音巴達爾琥辦事勤能家心傾服請補總管允之是部天和土腴有灌溉之利宜麥有金銅石棉諸礦林木亦富達布遜山產石鹽是部全境及移布多北部皆資之唐努薩拉吉克托錦三總管各有佐領四庫布蘇庫諾渾爾總

管佐領二奇木奇克河總管佐領十薩拉吉克別名薩爾吉格托錦別名陶吉
總管皆無印庫布蘇庫勒諾爾別名庫蘇古淖爾奇木奇克河別名肯木次克
有印此外扎薩克圖汗部右翼右旗有五佐領一在庫蘇古爾泊北一在華克
穆河東北一在格德勒爾河西一在謨什克河西一在扎庫爾河源養音諾顏
部額魯特貝子旗佐領十三皆南依鄂爾噶汗山西接阿爾泰淖爾烏梁海哲
布尊丹巴呼圖克圖徒衆所屬佐領三西臨華克穆河

阿爾泰烏梁海在科布多之西東額魯特東南扎哈沁及布勒罕河新土爾扈
特哈爾察克新和碩特南和博克薩里舊土爾扈特東北杜爾伯特北阿爾泰
淖爾烏梁海分左右翼左翼旗四右翼旗三初屬準噶爾乾隆十八年喀爾喀
扎薩克圖汗等台吉達什朋素克隨北路軍營參贊大臣薩喇爾擒私入科布
多汛之烏梁海人扎木圖等十九年正月命薩喇爾等統兵征入卡之準噶爾
屬烏梁海釋北路軍營誘捕之烏梁海瑪木特等令回部落二月準噶爾烏梁
海庫木來降三月命舒赫德赴卓克索地方會薩喇勒招撫烏梁海尋以烏梁

海徙牧額爾齊斯等地令暫撤兵是月以牧撫烏梁海移北路軍營於烏里雅蘇台七月賽音諾顏貝子車木楚克扎布暨班第薩喇勒等擊烏梁海宰桑於察罕烏蘇降之十月班第薩喇勒進兵降阿爾泰居住之準噶爾烏梁海宰桑禡木特及通禱木特收戶口千餘復由阿爾泰赴索爾畢嶺進至布爾漢之察漢托輝額貝和碩地方獲宰桑庫克新等十一月以牧撫烏梁海加和碩輝特貝勒吉袋喇卜郡王銜編設烏梁海人戶旗分佐領設授宰桑車根赤倫察克達總管命庫克新於額爾齊斯屯田二十年正月察克達等兵至華額爾齊斯河收獲包沁宰桑等授察達克副都統子烏梁海總管赤倫副都統銜命招撫汗哈屯之烏梁海人衆免烏梁海等貢賦一年二月編察克達赤倫所屬烏梁海爲佐領七三月烏梁海宰桑都塔齊以指示投順之人逃竄正法命扎薩克圖汗部扎薩克台吉根敦等駐防海喇圖科布多等處管烏梁海游牧接收降人四月汗哈屯地方烏梁海歸順五月授歸順之烏梁海宰桑圖布新爲總管十月以烏梁海出牲畜接濟哈達哈西進之軍嘉賚之二十一年三月以阿逆

煽動烏梁海哈薩克道梗詔哈達哈勒烏梁海叛賊有固爾班和卓者奇爾吉
斯宰桑携千餘戶潛赴烏梁海賽音諾顏郡王車布登扎布及車登三不勒邀
擒之六月青衮咱卜叛誘新舊烏梁海附己大兵至皆來効順十月以新舊烏
梁海等備兵請討青衮咱卜嘉賚之授察克達內大臣二十二年二月命察克
達等防範準部叛賊達什車凌等逃入烏梁海四月以額魯特叛賊車布登多
爾濟屬人分給察克達等論察克達等俘輝特賊人功予其子侍衛賽圖布慎
赤倫洪郭爾等緞茶各有差九月命車布登扎布等防範阿逆等擾烏梁海十
月以阿爾泰淖爾烏梁海內附諭授官加賞定察達克所屬烏梁海每戶歲納
二貂給俸如內地官吏之半十一月克烏梁海扎哈沁人等歸還馬駝烏梁海
博和勒復降仍授總管二十三年二月歸併烏梁海管轄人戶編得沁允新舊
烏梁海均于烏蘭固木種地於吹阿勒和碩等處游牧尋命移科布多烏梁海
徙就阿爾泰山陽二十四年三月仍命郡王車布登扎布總理烏梁海事八月
烏梁海副都統莫尼扎布等招降鄂爾楚克人戶附入烏梁海大臣管轄授官

有差是年定阿爾泰山之南額爾齊斯爲是部牧地十二月以哈薩克人掠烏
梁海諭察達克等防勦二十五年四月以收撫烏梁海原任總管阿喇逃散屬
人交察克達等兼管烏梁海總管扎布罕疏脫賊犯上以年幼宥之命察達克
派員協同辦事二十六年七月禁烏梁海私向哈薩克貿易二十七年三月允
展烏梁海卡坐九月嚴禁阿爾泰烏梁海竊取哈薩克馬匹十月以前經內附
續逃入俄羅斯之烏梁海庫克新假我烏梁海名劫掠哈薩克命察克達等領
兵捕治之十二月鑄烏梁海左右翼總管印分給察達克圖克慎銷原領阿爾
泰烏梁海總管印二十八年正月庫克新就擒戮之以招撫人戶給察克達等
分轄三十八年十二月以新土爾扈郡王舍楞與是部散秩大臣烏爾圖那遜
爲婚諭烏梁海緊接俄羅斯瑚圖靈阿等嗣後詳爲留意四十九年六月給阿
爾泰台站內大臣察達克轄烏梁海官兵協濟銀兩道光十八年以哈薩克潛
闖入阿爾泰烏梁海命烏里雅蘇台參贊大臣車林多爾濟領蒙兵逐之科布
多參贊大臣毓書遣科布多主事職銜哈楚日進領兵逐入烏梁海之哈薩克

依滿等于烏里雅蘇圖八月追敗之于沙拉布拉克九月又逐再入烏梁海之哈薩克使過于庫克仲阿林子獎十一月車林多爾濟奏前入烏梁海土爾扈特之哈薩克驅逐已淨獲十餘人釋之十二月于烏梁海副都統車伯克達什等花翎以論驅逐潛入游牧哈薩克勞十九年四月哈薩克復入烏梁海命車林多爾濟復調兵逐之八月以阿爾泰烏梁海右翼散秩大臣達什濟克巴調營未到嚴議于驟逐哈薩克妥速之阿爾泰左翼散秩大臣達爾瑪阿扎拉頭品頂戴仍下部優叙二十二年科布多參贊大臣固慶奏達爾瑪阿扎喇時常稱疾偷安不善撫馭所任散秩大臣管烏梁海四旗事務煩游牧遼闊且與俄羅斯接壤責任綦重請令離任以參領唐喀祿署之咸豐十五年與俄羅斯定西疆界約同治三年八月科布多參贊大臣廣鳳等奏卡倫以內阿爾泰烏梁海境內奇林河等地方十七處有哈薩克公阿吉屬下之哈濟克居住當分界未終之際未使一旦驅逐倘分界後萬不得已必須內遷宜由塔爾巴哈臺參贊大臣酌擇地方安置十一月俄人闖入是部庫什業莫多及塔布圖地方滋

擾明詎照會俄悉畢爾總督先爲查辦來我邊卡滋事官兵俟明年兩國立界大臣會同建立牌博後再派兵駐守四年以伊塔諸城回變命設烏梁海台站遞送科城至塔城文報軍餉十二月塔爾巴哈台參贊大臣錫霖劾廣鳳裁撤烏梁海台站致文報軍餉阻滯諭廣鳳等議處仿令復設五年五月塔爾巴哈台失守領隊大臣圖庫爾領額魯特兵移至是部七年三月命奎昌會同俄官建立科布多毗連俄境界牌鄂博九月奎昌等以俄使未到奏俟明年會辦立界八年奎昌與俄立界使臣巴布闊福勒明自科布多東北邊界賽留格木山適中之布果素克達巴哈起向西南順賽留格木山至奎屯鄂拉往西沿大阿爾泰山至海留圖兩河之山轉往南順是山直至察奇勒莫斯鄂拉轉往東南沿宰桑淖爾之邊循喀喇額爾齊斯河岸至瑪尼圖噶圖勒幹卡勒倫分爲兩國交建牌博凡二十首曰布果素克達巴哈次曰杜爾伯特達巴哈曰塔布圖達巴哈曰博勒齊爾曰察幹布爾哈蘇曰烏爾達巴哈曰巴那斯達巴哈曰薩爾那開曰巴爾哈斯達巴哈曰拜巴爾塔達巴哈曰庫爾楚木曰特勒克梯

曰固洛木拜曰薩拉陶曰薩勒欽車庫曰特斯愛哩克曰鄂里雅布拉克曰奇音克里什曰察奇勒莫斯末曰瑪呢圖噶圖勒幹自五月二十五至七月三日竣事十月命棍噶扎拉參赴阿爾泰山收集徒衆妥辦安插事宜十一月免是部本年例貢貂皮其後伊犁索倫營兵移至阿爾泰山與塔城額魯特兵皆由棍噶參暫統之十年署伊犁將軍榮全奏以由科布多屬扎哈沁五台以西至霍博克薩里一二千里非就地設台後路必斷令烏梁海章蓋等於西翼設察罕通格托克鄂博德格圖阿滿三台於東翼設多魯圖阿滿額爾奇賽罕烏里雅斯三台自是爲科塔兩城孔道十一年調棍噶扎拉參所部索倫額魯特兵赴塔城十二年十一月回排窠新土爾扈特之布爾根河邊是部境台站官兵紛紛逃散烏魯木齊領隊大臣錫綸率所部民勇自阿爾泰山南移營烏龍古河南岸追至霍博克河下游擊破之匪窠綏來縣北境科布多參贊大臣保英等飭烏梁海速將軍台移回原處安設光緒七年七月以棍噶扎拉參在烏梁海達彥地方收撫哈薩克擅殺頭目柯伯史之子諭錫綸飭棍噶扎拉參即回

籍八年俄人議重劃科塔中俄之界欲占哈巴河一帶科布多參贊大臣清泰等奏俄人數百名突至哈巴河查新定條約內奎峯山卽阿爾山任其勘改實有關鍵八月阿爾泰左翼散秩大臣等復呈清泰等以前次界劃烏梁海西北境侵占已多此次若再佔哈巴河蒙民無地自容誓死不能退讓諭清安額爾慶額會商金順升泰妥籌九年額爾慶額偕參贊大臣升泰先期馳赴塞上察邊塞衝要辨山川主名以乘哈巴河奎峯山二要地烏梁海哈薩克之衆均無所依與俄官抗爭相特兼旬改以哈巴河以西阿拉喀別河爲界得展地百三十餘里分道安設新界牌博既峻事額爾慶額又繞北山道大彥淖爾安插烏梁海兩翼部落以和里木圖河雅瑪圖酌洛圖西里布拉克爲夏季游牧以罕達蓋圖河塔里雅圖青格里河烏龍古河爲冬季游牧而哈巴河仍由塔城置戍以金順奏諭阿爾泰山烏梁海屬一帶游牧地方請飭棍噶扎拉參交回安插蒙民十二年七月以沙克都爾扎布等奏復催棍噶扎拉參將徒衆仍回塔城十三年諭劉錦棠等於新疆擇安插棍噶扎拉參之地十五年二月劉錦棠

奏移棍噶扎拉參徒衆子庫爾喀喇烏蘇屬之八英溝讓還科布多借地承化寺就近所招徒衆聽留居其寺哈巴河一帶塔城自借地以來卽已派兵駐守未便委去俾俄人得乘便南下從之十八年六月沙克都林扎布額爾慶額魁福會勘奏哈巴河借地暫難歸還以塔城兩次分界後蒙哈不敷分住請將借地展緩三年交割烏梁海困苦擬令塔城哈薩克酌給牲畜並籌安插逃戶派兵駐守允之其後科城屢請收回哈巴河塔城爭之迄未決二十六年邊防戒嚴參贊大臣瑞洵檄烏梁海每旗挑兵二百名牛馬半步駐防本旗事定徹之以烏梁海各旗保護俄商貨物安全游牧一再請獎二十九年閏五月子烏梁海左右翼散秩大臣額爾克舒諾三音博勒克均頭品頂戴左翼總管倭齊爾扎布桑敦扎布右翼總管棍布扎布瓦齊爾扎布均二品頂戴左翼副都統察罕博勒克亦子獎二十九年塔城以哈巴城地交還科城三十年五月改設科布多辦事大臣駐阿爾泰山以錫恒爲之仍駐承化寺三十二年七月定阿爾泰練陸軍馬隊一標炮隊一營設哈巴河防營委員及沙黎蓋台至承化寺馬

撥十六處每處設蒙古馬兵五名馬十匹開辦承化寺庫克呼布克木哈巴河四處屯牧建城署房屋撥常經年費十三萬兩開辦經費三十一萬兩有奇十二月是部七旗劃隸阿爾泰三十四年四月錫恆奏停辦布倫托海上渠下渠距水較近擬再試種一年奇克官木官屯暫撥民辦宣統三年二月署辦事大臣延年奏開距承化寺七十里之紅墩渠安插農民下部知之地兼耕牧有鑛有鹽是部有佐領七副都統暨左右翼散秩大臣均兼一旗總管卡倫自再劃界後南起右翼散秩大臣旗之阿拉克別克而北曰阿克塔斯又東北曰克雜那阿斯曰薩斯曰呼吉爾圖布拉克曰烏松呼吉爾圖轉東曰胡布蘇訖羅蓋布東北至左翼散秩大臣旗之雀洞淖爾止凡八卡倫山之著者西吉克圖山凌拉圖山雀穆達山哈喇溫爾常山水之著者察罕西魯河薩格賽河薩克布多河吉格里河額爾齊斯河阿爾泰淖爾烏梁海在科布多之西北東唐努烏

梁海南

阿爾泰烏梁海西與北均俄羅斯初屬準噶爾乾隆二十二年九月賽音諾顏

扎薩克貝勒車布楚克札布招撫阿爾泰山烏梁海有持勒伯克扎爾扎爾納克者阿爾泰渚爾之烏梁海宰桑携屬至詔車木楚克札布定貢實例寧宣德意十二月授阿爾泰渚爾烏梁海宰桑特勒伯克等爲總管二十三年秋烏梁海總管阿拉善思克等叛車木楚克札布勦阿喇善等就擒思克竄哈屯河冬擒之尋定是部爲二旗各設總管一歲貢貂皮如例隸科布多參贊大臣道光中查邊之政積弦俄人始築城於是部之吹河我查邊界鄂博者往往不至其地咸豐十年定西疆界約俄國畫界清單遂將是部包去同治六年七月科布多參贊大臣廣鳳等奏俄雅什達喇城衙門給阿爾泰渚爾兩旗總管文言阿爾泰渚爾綽羅什拜巴什庫斯吹河均係俄羅斯游牧如有人言係中國游牧拿送俄城又俄人來綽羅什拜地方代木已飭總管察罕等善言開導靜候兩國分界大臣將疆界議定換約立界後再按照所分界限遵行此時不可伐木蓋房致滋事端時俄國官兵執去我查閱哈屯河扎薩克扎那扎布及台吉差官蒙古員兵等阻我查邊道路稱是部游牧爲俄國地面不許中國人往來十

月阿爾泰淖爾總管莽泰等報俄官取莽泰旗下一百四十餘人及總管察罕旗下二百四十餘人手印九月明詎錫霖博勒果索興俄分界大臣照議單勘分西界是部地遂非清有初議遷是部誠心內附者於卡內而總管莽泰等言兩旗人丁祈全入卡內住牧廣風等諭以所被俄國分去地面舊住人丁隨地歸爲俄國務令安居故土各守舊業立界後斷不致仍前擾害隨令莽岱等出卡回牧并內徙之議亦輟是部有佐領四